

maachen, an hir Famill, déi an der Regel an där Géigend wunnt, ass och esou méi no bei hinnen. Dofir begréisst mer, dass mer dezentral Investitiounen fir Centres intégrés queesch duerch d'Land maachen.

Mir wëlle vun der Geleeënheet profitéieren, fir drop opmierksam ze maachen, dass déi Politik, fir dodran ze investéieren, muss weidergefouert ginn, bis dass mer wierklech eng Kéier un déi Situatioun erukommen, dass mer all de Leit hei am Land, déi et néideg hunn, kënnen esou e Bett offréieren. An deem Sënn bréngen ech d'Zoustëmmung vun eiser Säit fir dëse Projet.

M. le Président.- D'Wuert huet den Här Camille Gira.

M. Camille Gira (DÉI GRÉNG).- Här President, Dir Dammen an Dir Hären, ech weess net, ob et duergeet eng Schwëster ze hunn, déi am Oste wunnt, fir hei elo däreft matzeschwätzen, mä jiddefalls wëll ech direkt den Accord vun der Fraktioun vun deene Gréngen zu dësem Projet bréngen.

Mir si frou fir all Plaz, déi an engem Altersheim, engem Fleegeheim geschafte gëtt, well dat d'Lëscht vun deene Leit, déi drop waarden, fir an esou eng Institutioun eranzekommen, méi kuerz mécht. Dat kënnen mir als Gréng selbstverständlech nëmme begrëssen.

M. le Président.- D'Wuert huet d'Mme Ministerin Marie-Josée Jacobs.

Mme Marie-Josée Jacobs, Ministre de la Famille, de la Solidarité sociale et de la Jeunesse.- Här President, ech géif och wëllen der Mme Meyers-Frank merci soe fir hiren ausféierleche Bericht, dee mer et wierklech erlaabt, fir net méi brauchen op iergendeen Detail anzegoen.

E Projet, deen zwielef Joer ënnerwee war, ass sécher kee Glanzstéck vu legislativer Aarbecht.

(Interruption)

Wa verschidde Leit eng Kéier kommen, fir iwwert d'Ges-tioun vu Projeten ze schwätzen, wäert ech hinnen deen heiten an Erënnerung ruffen.

Bestëmmt ass de President a sinn d'Membere vum Hos-pice civil den Owend esou frou wéi de Buergermee-schter vun lechternach, dass se elo endlech d'Aussicht hunn, fir déi Suen, déi se während laange Jore virge-streckt hunn, zrëckzekréien.

Ech soen lech merci.

M. le Président.- D'Diskussioun ass ofgeschloss a mir kommen zur Lecture vun den Artikelen vum Projet de loi 4878 a stëmmen driwwer of.

Lecture du texte du projet de loi (par M. Niki Bettendorf)

D'Artikelen 1 bis 3 si gelies an ugeholl.

Mir maachen de Vote vum Projet de loi 4878.

Vote sur l'ensemble du projet de loi et dispense du second vote constitutionnel

Déi fir de Projet sinn, stëmme mat Jo, déi aner mat Neen oder si enthalen sech.

De Projet de loi ass unanime mat 58 Stëmmen ugeholl.

Ont voté oui: MM. Willy Bourg, Lucien Clement, Marcel Glesener, Jean-Marie Halsdorf (par Mme Ferny Nicklaus-Faber), Norbert Hauptert, Ady Jung, Nico Loes, Paul-Henri Meyers, Mme Marie-Josée Meyers-Frank, M. Laurent Mosar, Mme Ferny Nicklaus-Faber, MM. Patrick Santer, Marco Schank, Jean Spautz, Mme Nelly Stein, MM. Nicolas Strotz, Fred Sunnen, Lucien Weiler et Claude Wiseler (par M. Ady Jung);

Mme Simone Beissel, MM. Jeannot Belling, Xavier Bettel (par Mme Simone Beissel), Niki Bettendorf, Emile Calmes, Gusty Graas, Paul Helminger (par M. Jeannot Belling), Alexandre Krieps (par M. Gusty Graas), Claude Meisch, Mme Maggy Nagel, MM. Jean-Paul Rippinger, Marco Schroell, John Schummer et Théo Stendebach;

MM. Jean Asselborn (par M. Ben Fayot), Alex Bodry, Mme Mady Delvaux-Stehres, M. Mars Di Bartolomeo (par M. Jos Scheuer), Mme Lydie Err, MM. Ben Fayot, Jean-Pierre Klein, Lucien Lux, Mme Lydia Mutsch (par M. Alex Bodry), MM. Jos Scheuer, Georges Wohlfart (par Mme Mady Delvaux-Stehres) et Marc Zanussi;

MM. Jean Colombero, Gast Gibéryen, Fernand Greisen, Jacques-Yves Henckes, Aly Jaerling, Jean-Pierre Koepf et Robert Mehlen (par M. Aly Jaerling);

MM. François Bausch, Robert Garcia, Camille Gira, Jean Huss (par M. François Bausch) et Mme Renée Wagener (par M. Robert Garcia);

M. Aloyse Bisdorff.

Ass d'Chamber d'accord, fir d'Dispens vum zweete Vote ze ginn?

(Assentiment)

Et ass esou decidéiert.

(M. Jean Spautz reprend la Présidence)

Mir kommen elo zur Diskussioun vum Projet de loi 4137. D'Wuert huet d'Rapportrice vum Projet de loi, déi hono-rabel Mme Ferny Nicklaus-Faber.

6. Projet de loi 4137 portant institution d'un comité luxembourgeois des droits de l'enfant, appelé "Ombuds-Comité fir d'Rechter vum Kand" (ORK)

Rapport de la Commission de la Famille, de la Solidarité sociale et de la Jeunesse

Mme Ferny Nicklaus-Faber (CSV), rapportrice.- Här President, Dir Dammen an Dir Hären, am Moment vun der Ratifizéierung vun der Kannerrechtskonventioun, déi den

20. Dezember 1989 vun der UNO-Vollversammlung ugehall ginn ass, ass d'Fro opkomm, ob een iwwerhaapt eng spezifesch Konventioun fir d'Kanner bräicht, ob d'Mënscherechtskonventioun vum Europarat net géif duergoen, respektiv ob eise gesetzleche Kader net géif de Kanner déi néideg Protektioun garantéieren.

Deemools gouf dës Fro mat engem kloren Nee beäntwert. Dës Äntwert gëllt nach haut. E Kand ass e vollwäertege Mënsch, dee Rechter huet. Wéinst dem Mangel un Erfahrung an u Maturitéit brauch d'Kand en extrae Schutz, besonnesch um rechtliche Plang.

D'Kannerrechtskonventioun vun 1989 huet de Mérite, dass se déi verschidde Schutzprinzipien a Saache Kannerrechter an engem internationalen Text regroupéiert, d'Rechter vun de Kanner unerkennt an d'Obligatiounen vun de Länner, beziehungsweise vun den Elteren festhält.

Mä wat ass mat där praktescher Applikatioun vun dese Rechter? Et geet nämlech net duer, Rechter unzeerkennen, mä konkret Aktiounen a Moossname si gefrot, fir dass d'Kannerrechtskonventioun net als eng einfach Absichtserklärung an d'Geschicht vun de Kannerrechter agoe soll.

Dës Bedenke ginn och klar aus dem Konventiounstext eraus. Niewent der Verbreedung vun der Konventioun selwer, zu där sech all Stat, deen d'Konventioun ënnerschriwwen huet, verpflichtet huet, gesäit den UNO-Text och vir, dass sech all Land dem Contrôle duerch en internationale Comité fir d'Rechter vun de Kanner ënnerstellt.

Verschidde Länner - ech wäert nach eng Kéier dorop ze schwätze kommen - sinn de Wee gaangen, dee mir haut ginn. Si hunn eng Struktur geschafen, déi sech fir d'Verteidigung an d'Promotioun vun de Kannerrechter an hirem Land aetzt. Meeschtens gehéiert zu de Missiounen vun esou enger Struktur d'Analys vun de Gesetzer, d'Diffusioun vun de Prinzipien vun der Konventioun an d'Verfaasse vun engem Bericht iwwert d'Situatioun vun de Kanner. Esou en Organ kann och Avisen zu de verschiddene juristeschen Texter a Gesetzesprojeten ofginn oder Moossname proposéieren, fir dass d'Rechter vun de Kanner besser garantéiert ginn.

De Gesetzesprojet, dee mir haut an der Chamber zur Ofstëmmung virleien hunn, gesäit d'Aetze vun esou enger Struktur vir, den Ombuds-Comité fir d'Rechter vum Kand, kuerz genannt ORK.

Dese Projet stellt domat eng konkret Ëmsetzung vun der UNO-Konventioun vun 1989 duer. Mä doriwwer eraus gehéiert den ORK zur Jugendschutzbewegung, déi op den Ufank vum 19. Jorhonnert zrëckgeet.

D'Chrëschtentum huet, andeem et d'Gläichheet tëscht de Mënschen an d'Flichte vun den Elteren vis-à-vis vun hire Kanner proklaméiert huet, d'Fundament zur Unerkennung vun de Kanner als "Sujet de droit" geluegt. Mä de Wee zu dëser Unerkennung war laang an ass nach net komplett ofgeschloss.

Am Laf vum 17. an 18. Jorhonnert ass d'Roll vun den Elteren an d'Stellung vum Kand nei definéiert ginn. Mä et ass den napoleonesche Code civil, dee fir d'éischt d'Wäertstellung vum Kand um rechtlichen Niveau festgehalen huet. Et bleift, dass esouwuel de Code civil vun 1804, deen iwwerens bis an d'60er Joren ouni gréisser Modifikatiounen applizéiert gouf, wéi de gréissten Deel vun de Gesetzer, déi am Laf vum 19. an 20. Jorhonnert gestëmmt gi sinn, méi de Schutz vum Kand wéi d'Unerkennung vu senger Rechter als Objektiv haten.

Schützend Moossname si besonnesch am sozialen a gesondheetleche Beräich am Laf vun de Jorzéngte geholl ginn. Et kënnt een all d'Gesetzer opzielen, déi zënter 1810 d'Aarbecht vun de Kanner a vun de Mineure reglementéieren oder déi, déi e medezinesche Suivi vu schwangere Fraen a kleng Kanner virgesinn, bis hin zur Protection de la Jeunesse, déi, wéi den Numm et seet, der schützender Philosophie ënnerluegt ass.

Et ass eréischt säit e puer Joer, dass d'Kannerrechter explizit unerkannt ginn. Als Beispill kann een d'Gesetz iwwert d'Prestations familiales vun 1985 opzielen, wat dem Kand an net den Elteren d'Recht op eng Prestatioun zousprécht, oder d'Gesetz vun 1992 iwwert d'Protection de la Jeunesse, dat virgesäit, dass d'Kand Recht op een eegenen Affekot huet.

Während dem leschte Jorzéngt huet den Europarat d'Memberstaten opgefuerdert, d'Aetze vun enger spezifischer onofhängeger Struktur virzegesinn, déi als Mission d'Promotioun vun der Kannerkonditioun hätt.

Eis Chamber hat am Kader vun der Ratifizéierung vun der Kannerrechtskonventioun am Joer 1993 e puer Motiounen gestëmmt an d'Regierung opgefuerdert, ënner anerem d'Ariichtung vun enger Ombudsstruktur fir Kanner ze schafen. D'Regierung huet datselwecht Joer dem Ministère de la Famille den Optrag ginn, en Aarbechtsgrupp anzesetzen, dee sech ënner anerem mat de Motiounen vun der Chamber a besonnesch mat der Ariichtung vun enger Struktur "type Ombuds" befaasse sollt. D'Aarbecht vun dësem Groupe de travail, deen eng Rei Leit aus dem In- an Ausland befrot huet, ass an dee virleiede Projet de loi agefloss.

D'Regierung huet nach eng Kéier hire Virsaz, eng besonnesch Struktur fir d'Kanner ze schafen, an hirer Deklaratioun vum 22. Juli 1994 zum Ausdrock bruecht.

De 5. Mäerz 1996 ass dese Gesetzesprojet vun der Familljeministesch deponéiert ginn.

Wann déi legislativ Prozedur esou laang gedauert huet, ass dat dorop zrëckzeféieren, dass dese Projet fir vill Diskussioun a Kontroverse gesuergt huet, déi mat sech bruecht hunn, dass den ursprüngelechen Text komplett modifizéiert ginn ass, net zulescht vun der zoustänneger parlamentarescher Kommissioun.

D'Regierung huet den Text zweemol amendéiert.

Déi lescht Amendementer, an och déi wichtegst an deem Sënn, dass dës Amendementer déi aktuell Dispositiounen vum Projet festgehalten hunn, déi si vum 19. Februar 2001. Dës Ëmännerungen droen dem Avis an de Propositionen vum Statsrot Rechnung. Den amendéierte Projet huet ee vill méi klengen Objet a limitéiert sech op d'Arichtung vun engem Ombudscomité. Allgemeng Bestëmmungen iwwert d'Ofsicherung vum Kand an déi domat verbonnen Neiarrichtungen, wéi e Bureau de l'enfance, deen Informatiouns-, Orientatiouns- a Mediationsmissiounen ugeholl hätt, oder eng Banque de données iwwert plazéiert Kanner, sinn aus dem Projet erausgeholl ginn.

D'Commission de la Famille huet dësen Text den 19. Februar 2001 bis op zwee Punkten, déi si amendéiert huet, majoritär ugeholl. Den Text ass net nëmmen de Kritikke vun de Berufschamberen, vun den Associatiounen, déi am soziale Beräich schaffen, vum Statsrot oder nach vun der Commission consultative des Droits de l'Homme ausgesat gewiescht, hien huet och fir vill Diskussiounen am Kader vun der parlamentarescher Kommissioun gesuergt.

Ech géif hei gären eng kleng Parenthèse opmaachen an zur Commission consultative des Droits de l'Homme kuerz bemierken, dass dës Organisatioun eng äusserst kuriéis Virgehensweis un den Dag geluegt huet. Net nëmmen huet dëst Organ aus eegener Initiativ en Avis zum Gesetzesprojet ofginn, wat jo u sech kee Problem ass, am Géigendeel, mä dëst Organ huet et net fir néideg fonnt, säin Avis der Chamber an der parlamentarescher Familljekommissioun zoukommen ze loossen. Si wousste vun der Existenz vun esou engem Avis näischt. Si hunn dervun aus der Press erfuer. Esou e Virfall ass bedauernswäert, virun allem wann ee bedenkt, dass de Statsrot dësen Avis kritt huet an a sengem leschten Avis zitéiert huet.

Wa mam Prinzip, eng Struktur fir d'Kanner ze schafen, jiddfereen averstanen ass, trenne sech dach d'Gemitter, wann et drëms geet, wat fir eng Form dës Struktur soll unhuelen. Et si virun allem d'Associatiounen am soziale Beräich wéi och de Statsrot, déi sech géint eng kollegial Struktur, esou wéi se am Projet virgesinn ass, ausgeschat hunn. De Statsrot huet awer keng Opposition formelle gemaach.

D'Auteurs vum Projet de loi hunn de Choix getraff, d'Kannerrechtskonventioun vun 1989 ze concrétiséieren, andeems se eng spezifesch Struktur virgesinn, déi sech un d'Situatioun vun eisem Land upasst. Well eist Land kleng ass an de Risiko, dass eng eenzel Persoun méi staark ënner Drock ka komme wéi eng kollegial Struktur, hunn d'Auteurs vum Gesetz sech fir e Comité ausgeschwat.

Dobäi ass dat lëtzebuergescht Ombudskonzept alles wéi net eenzegaarteg. Frankräich an déi belsch Communauté flamande sinn déi eenzeg, déi eng Ombudspersoun au sens strict instituéiert hunn. D'Beispill vun Dänemark ass ganz interessant: Dëst Land, wat och zu deene kleng Länner gehéiert, huet sech, nodeems virgesi war, eng Ombudspersoun ze schafen, dach schlussendlech fir eng

kollegial Form entschloss. D'Objektiver vum dänesche Conseil national pour les enfants sinn hoergenau déiselwecht wéi déi vun enger Ombudspersoun. Et géif kengem an de Sënn kommen, fir d'Onofhängegkeet an d'Kompetenz vun dësem dänesche Conseil, deen zu de Fondateuren vum europäesche Médiateursréseau gehéiert, unzweifelen. Well, wat zielt, ass net d'Form, mä d'Philosophie an d'Orientatioun, déi dëser Struktur zugrund läit. An den ORK entsprécht genau dës Kriterien.

D'Missioun vum ORK ass et, d'Rechter vum Kand ze schützen an ze promovéieren. An dësem Sënn gëtt dem Comité eng Rei vu Funktiounen unerkannt, déi mat de Kannerrechter an deene betreffende legislativen Texte ze dinn hunn. Et gehéiert zu sengen Attributer, bestoend Texte ze analyséieren, Recommandatiounen ze maachen oder Avisen zu Texte a Gesetzesprojeten ofzeginn. Den ORK ka sech iwwert d'Situatioun vun de Kanner am Land äusseren. Hie kritt Informatiounen iwwer Verletzung vu Kannerrechter a kann zu dësem Zweck Kanner héieren, ouni elo awer kënnen direkt anzegräifen. Dat ass d'Aufgab vun aneren Institutiounen a Servicer, déi vum ORK kontaktéiert kënne ginn.

Den ORK ass am Géigendeel zu deem, wat Verschiddener fäerten, eng onofhängeg Struktur. De Secret professionnel, deem d'Membere vum ORK ënnerworfen sinn, ass een Aspekt vum Comité senger Onofhängegkeet. Deen aneren Aspekt stellen d'Incompatibilitäten tëschent dem ORK-Mandat an anere Funktiounen duer.

De Statsrot ass der Meenung, an domat spigelt hien d'Positioun an d'Suerge vum soziale Secteur erëm an och déi, déi verschidde Membere vun der Kommissioun während den Debatten un den Dag geluegt hunn, dass de Comité näischt anescht wär wéi eng administrativ Struktur, déi Schwierigkeete géif kréien, fir bei den Haaptinteresséierten, de Kanner, unzekommen. D'Kanner bräichten eng Bezugspersoun, déi eleng verantwortlech wier, heescht et am Avis vum Statsrot. Déi kollegial Form wier och keng Garantie fir d'Onofhängegkeet vum ORK, liest ee weider. Bleift och nach de Problem vun der Disponibilitéit vun de Membere vum ORK, déi ausser dem President oder der Presidentin, net à plein temps agestellt sinn.

Während den Diskussiounen an der Familljekommissioun hu sech zwou Tendenzen erauskristalliséiert, dovun eng sech, schematesch gesinn, den Iwwerleeunge vum Statsrot uschléisst, déi aner éischter d'Positioun vun den Auteurs vum Projet vertritt. Dës zweet Tendenz weist op auslännesch Experienzen hin, déi beweisen, dass eng kollegial Form duerchaus effikass ka sinn. Alles hängt, wéi ëmmer, vun dem perséinlechen Engagement vun de Memberen of, a virun allem vum President, deen, wann hie sech komplett a senger Missioun asetzt, duerchaus als Ombudspersoun identifizéiert ka ginn.

An dësem Kontext ass ze bemierken, dass den Titel vum President oder der Presidentin: "Ombudspersoun fir

d'Rechter vum Kand", deem seng leedend Funktioun valoriséiert. Et brauch een also net ze fäerten, dass de President en einfache "primus inter pares" gött. D'kolle-gial Form léist sech ausserdeem, fir dës zweet Tendenz, och duerch d'Tatsaach erklären, dass de President op eng pluridisziplinär Equipe ziele muss, fir senge Funktioun korrekt nogoen ze kënnen.

D'parlamentaresch Kommissioun huet sech schlussend-lech a senger grousser Majoritéit der Propos vun den Auteurs vum Gesetzesprojet ugeschloss mat der Be-grënnung, dass ee misst dëser Struktur d'Chance ginn, fir sech ze behaupten. Falls dës Form sech als net ade-quat erweise géif, respektiv falls Problemer optauche géifen, ass et jo ëmmer méiglech, déi eng oder aner Adaptatioun virzehuelen.

Den Text, dee mir haut zur Ofstëmmung virleien hunn, besteet aus dem amendéierten Text vun der Regierung vum 19. Februar 2001 plus d'Amendementen, déi d'Kommissioun adoptéiert huet an déi och vum Statsrot aviséiert gi sinn.

Den éischte parlamentareschen Amendement bezitt sech op den Intitulé vum Gesetzesprojet. De Statsrot hat a sengem Avis vum 9. Oktober 2001 proposéiert, den Titel vum Gesetz ze änneren. Den Intitulé soll mam Objet vum Projet iwwerenee stëmmen. D'Familljekom-missiouen huet d'Usicht vum Statsrot gedeelt an den Titel ofgeännert. De Projet de loi heescht elo: "Projet de loi portant institution d'un comité luxembourgeois des droits de l'enfant, appelé "Ombuds-Comité fir d'Rech-ter vum Kand" an heescht net méi "Projet de loi portant sur la promotion des droits de l'enfant et la protection sociale de l'enfance."

Den Artikel 5 vum Projet de loi ass vun der Kommissioun amendéiert ginn. D'Kommissioun war der Meenung, dass et besser wär, dass de Comité eng fix numeral Ze-summesetzung hätt. Den Text vun der Regierung hat vir-gesinn, dass de Comité kënn maximal sechs Leit hunn. Et kënn een doraus schlëssen, dass d'Zesummesetzung vum Comité variabel wier, wat net wëschenswäert ass. Esou ass décidéiert ginn an der Kommissioun, den Term "maximal" aus dem Text erauszehuelen. De Comité setzt sech aus sechs Leit zesummen, dovun e President oder eng Presidentin, déi vum Grand-Duc nominéiert ginn, fir e Mandat vu fënnef Joer, Mandat, wat eng Kéier er-neierbar ass.

D'Lëscht vun den Incompatibilitäten ass och ausgeweit gi bis hin zum Gemengeconseiller. All d'Membere vun de Gemengeréit, an net nëmmen d'Buergermeeschteren an d'Schäffen, solle vun der Funktioun vu Member vum ORK ausgeschloss ginn. Niewent de Membere vun de Ge-mengeréit sinn och nach d'Deputéierten, d'Membere vum Statsrot a vun der Regierung vun de Funktiounen am Kader vum ORK ausgeschloss. D'Conseillers de Gouver-nement gehéieren zur Regierung a kënnen dofir och net Member vum ORK ginn.

De Statsrot hat a sengem Avis vum 9. Oktober 2001 d'Fro vun der Révocation vum de Membere vum ORK opge-worfen. D'Familljekommissioun huet der Propos vum Stats-rot, esou eng Prozedur virzegesinn, Rechnung gedroen an zwee nei Alinéaen an den Artikel 5 integréiert, déi de Prinzip vun esou enger Révocation duerch de Grand-Duc festsetzen an d'Hypothesen opzielen, wou e Mandat widderruff ka ginn. Dat ass zum Beispill de Fall, wann de Member stierft oder démissionnéiert oder wann hie seng Eierbarkeet verléiert an net méi amstand ass, fir an dësem Comité ze schaffen.

Nach ee Wuert zum Artikel 1 vum Gesetzesprojet, deem den Objet vum Gesetz definéiert. De Statsrot huet d'Mee-nung vertrauden, et misst een dësen Artikel och ëmän-neren an den Objet esou definéieren, dass e mat där eenzeger konkreter Moosnam, déi geholl ginn ass, an zwar d'Institution vum ORK, iwwerenee stëmmen géif. No dësem Artikel ass den Objet vum Projet de loi d'Pro-motioun an de Schutz vun de Kannerrechter. Dësen Artikel bezitt sech och ganz klor op d'Kannerrechtskon-ventioun. D'Kommissioun huet awer gemengt, dass dës Referenz wichteg wier, well de virleiende Projet eng prak-tesch Ëmsetzung vun der Kannerrechtskonventioun duerstellt. Esou wéi den Artikel am Text vum 19. Februar 2001 formuléiert ass, stellt hien de generelle Kader, an deem den ORK évoluéiert. Dësen Artikel ass net geännert ginn.

Här President, Dir Dammen an Dir Hären, den Text, dee mir vireien hunn, ass ee wichtigen Text, dee sécherlech zur Verbesserung vun der Konditioun vun eise Kanner an zu hirer aktiver Participatioun an der Gesellschaft wäert bäidroen. Ech géif dowéinst, am Numm vun der Familljekommissioun, d'Chamber bidden, dësen Text ze stëmmen.

Ech soen lech merci.

M. le Président.- D'Wuert huet d'Mme Marie-Josée Meyers-Frank.

Discussion générale

Mme Marie-Josée Meyers-Frank (CSV). - Här President, Dir Dammen an Dir Hären, fir d'éischt wëll ech der Rap-portrice, der Mme Ferny Nicklaus-Faber, merci soe fir hire schrëftlechen a mëndleche Rapport.

D'Kanner sinn eis Zukunft. Si sinn d'Haaptacteure vun der Gesellschaft vu muer. Si gestalten eis Gesellschaft. Mä wéi?

Alles hänkt dervun of, wéi d'Famill an d'Gesellschaft vun haut d'Kanner verstinn a respektéieren, ob si sech fir d'Rechter a fir d'Promotioun vun hirer Konditioun aset-zen oder net, ob si et fäerdeg bréngen, dëse Kanner d'Wärter an d'Prinzipien, op déi sech all Demokratie baséiert, ze iwwerdreien. Dobäi ass ze soen, dass awer esou eng Wäertverméttlung méi wéi nëmmen eng rhetoresch Konscht viraussetzt.

D'Kanner vun haut, d'gesellschaftlech Acteure vu muer, kënnen nëmmen eppes mat deene vermëttelte Wäerter a Prinzipien ufänken, wann dës Wäerter a Prinzipien och an der Praxis ëmgesat goufen a si e Beispill doheem an dobausse mat op de Wee kruten.

Wat bedeit et fir Erwuessener, e Sujet de droits ze sinn, wa si net als Kand an de Genoss vu verschiddene Rechter koumen. Wäerten d'Rechter vum Mënsch an Zukunft nach eng Bedeitung hunn, wann d'gesellschaftlech Acteuren als Kand zwar Rechter am Kader vun diversen nationalen an internationalen Texter unerkannt kruten, déi awer ni praktesch applizéiert gi sinn?

D'Kanner spigelen eis Gesellschaft erëm. Eng Gesellschaft, déi lues a lues am gaang ass, hir u Schizophrenie grenzend Attitude a puncto Kannerrechter ze iwwerwannen, eng Gesellschaft, déi et verstane huet, dass ee muss d'Rechter vun de Kanner an engem obligatoreschen Text formell unerkennen an doriwwer eraus duerch prezis Moosnamen an der Realitéit fest verankeren.

De virleiende Gesetzesprojet dréit sécherlech derzou bäi, d'Rechtssituatioun vun de Kanner an eiser Gesellschaft ze verbesseren. Andeem mir eng spezifesch Struktur schafen, déi sech ganz de Rechter an de Konditiounen vun de Kanner consacréiert, maache mir e Schrëtt méi a Richtung Unerkennung vun de Kanner als "sujets de droit". D'Kanner hu Rechter, an dat soll een op allen Niveauen, virun allem op dem rechtliche Plang, mä net ausschliesslech do, erëmfannen. Dofir ginn der Ombudsstruktur eng Rei vu Missiounen zouerkannt, déi zum Zil hunn, sech e klengt Bild vun der Situatioun vun de Kanner ze maachen, an ze kucken, wéi een dës Situatioun verbessere kéint. Dofir dierf den Ombuds-Comité fir d'Rechter vum Kand am Kader vu senger Missioun ënnert anerem Recommandatiounen maachen, oder Avisen zu Gesetzestexten oder Projeten ofginn, déi d'Kanner interesséiere kënnen.

Wat mir immens wichteg erschénkt, ass d'Méiglechkeet fir dës Struktur, d'Kand ze héieren, quitte datt en direkt an individuell Agraife vum ORK net méiglech ass. Den ORK ass méi an deem Fall eng Structure de guidance wéi eng Structure d'aide directe. Solutiounen a konkret Moosname ginn op engem aneren Niveau diskutéiert. Et bleift awer, dass d'Kanner vun elo un eng Struktur zur Verfügung hunn, déi an hirem Interesse schafft, a kuckt, sech fir hir Solutiounen anzesetzen.

Et ass vill iwwert den heitege Gesetzesprojet geschriwwen a gesot ginn. Et huet net u Polemik gefeelt, ganz am Géigendeel, obwuel ech der Meenung sinn, datt a Saache Mënschen- a Kannerrechter d'Polemik falsch op der Plaz ass. D'Geméider gi virun allem op engem Punkt ausereneen, an zwar op deem, vun der Fro, wat fir eng Form d'Ombudsstruktur soll kréien. De Fait, datt de virleiende Projet d'initial Form vun engem Comité bäibehalen huet, ass vu ville Säite kritiséiert ginn. Et gouf esouguer behapt, dës administrativ Struktur géif de Kanner

näischt abréngen, an d'CSV, déi hannert dësem Gesetzesprojet steet, hätt keen Häerz fir Kanner. Dat huet den Här Lux gemengt, an dat hunn ech schrecklech fonnt.

D'kollegial Form arrangéiert mat Sécherheet net déi Leit, déi gehofft haten, Drock op eenzel Persounen maachen ze kënnen. Et ass bekanntlech méi schwéier, e ganze Comité ze influencéiere wéi eng eenzel Persoun. Dat ass och den Haaptgrond, firwat d'Auteure sech fir eng kollegial Form entscheed hunn, a firwat och dës Form schlussendlech an der Kommissioun zréckbehalen ginn ass. Lëtzebuerg ass kleng, jidderee kennt deen aneren. D'kollegial Form war an ass d'Solutioun, fir all ongewënschten Amëschungen an der Aarbecht, an de Fonctiounen vum ORK ze vermeiden. Mir hätten keen Häerz gehat, wa mir d'Kanner enger eenzelner Persoun iwwerlooss hätten, déi vläicht méi Interesse vu verschiddene Lobbye vertrueden hätt wéi déi vun de Kanner. Doriwwer eraus ass et net d'Form, déi de Succès vun dëser Struktur wäert ausmaachen: Et sinn d'Moyenen, déi dës Struktur wäert hunn, an dee perséinlechen Engagement vu senger Memberen ass gefuerdert.

Vill Leit hu sech op Erfahrungen am Ausland baséiert, fir Kritik auszeüben. Dozou wollt ech zwou Saachen soen: Éischtens muss een net alles blannemännchen no-maachen ouni ze kucken, ob dat, wat am Ausland gemaach gëtt och fir eist Land a Fro kënnt oder net. D'Auteure vum Projet hunn auslännesch Experienze ënnert d'Lupp geholl a festgestallt, datt, bis op Frankräich an déi flamänesch Communautéiten an der Belsch, déi aner Länner, déi eng Ombudsstruktur hunn, sech fir e Comité respektiv fir eng komiteesaarteg Struktur ausgeschwat hunn. E Land wéi Dänemark zum Beispill, wat wéi Lëtzebuerg zu deene kleng Länner gehéiert, huet sech schlussendlech fir eng kollegial Form entscheed. Wéi een et am Rapport vun der Kommissioun noliere kann, géif et kengem an de Sënn kommen, d'Onofhängegkeet an d'Kompetenz vun der dänescher Struktur a Fro ze stellen, obwuel et sech ëm eng kollegial Struktur handelt. Esou gesinn ech och net an, firwat d'kollegial Form fir esou vill Diskussionsstoff gesuergt huet. Ech schlësse mech der Konklusioun vun der Familljekommissioun un, wa se seet, et misst een dem ORK d'Chance ginn, sech ze bewäeren. Wann d'Kritik berechtigt wäert sinn, an een agesäit, datt d'Kanner zum Beispill Schwierigkeeten hunn, eng Persoun mat dëser Struktur ze identifizéieren, an dofir net vun dëser Struktur Gebrauch maache kënnen, respektiv, wa mer gesinn, dass dës Struktur weinst senger Form net optimal senger Fonctiounen nogoe kéint, da muss een halt Ännerungen ervirbréngen.

Iwwert dës Meenungsënnerscheeder a puncto Form vun der Ombudsstruktur eraus bleift, datt mir am virleiende Gesetz de richtege Wee a Saache Kannerrechter ageschloen hunn. Et bleift awer nach vill an deem Beräich am Interesse vun de Kanner ze maachen. Mir si ganz am Ufank vun enger reeller Unerkennung vum Kand als Sujet de droit. Mir hunn nach e laange Wee virun eis, an et ass d'Aufgab vum ORK, eis op dësem Wee ze begleeten.

respektiv eis de Wee ze weisen. Ech wënschen, datt d'Membere vum ORK sech hirer wichteger Aufgab bewusst ginn. Dofir ass et wichteg, d'Membere mat allergréisster Virsicht erauszesechen.

Vill Kanner vun haut liewen an engem ongesonde Familljeklima, wou den ekonomesche Wuelstand dominéiert. Eegeninteresser an Egoismus loosse oft vill ze vill Kanner mat hire Problemer eleng, mat der Konsequenz, datt d'Kanner onzefridde sinn, an net wëssen, wat se maache sollen, an eventuell Zuflucht an Drogen respektiv Alkohol fannen. Dës Kanner hunn d'Recht, datt ee sech ëm si këmmert. Ech géif och dofir jiddferee bidden, seng Responsabilitéiten ze huelen, d'Politiker, andeem si hir partipolitesch Divergenzen iwwerwannen a probéieren op deem Terrain Solutiounen ze fannen, déi am Interesse vum Kand sinn. Ech gesinn de virleiende Projet och als Impuls, fir a verschiddenen Dossieren, wéi zum Beispill an deem vun der "Jeunesse en détresse" endlech erëm weider ze schaffen.

Zum Schluss wollt ech nach bemierken, datt et wichteg ass, datt d'Kanner an d'Bild gesat ginn, dat heescht iwwert dëst Gesetz informéiert ginn. Si musse wëssen, u wie si sech wende kënnen, wa si Problemer hunn, a si solle wëssen, wat d'Missioune vum ORK sinn, wat hinnen hëlleft aus hirer Problematik erauskommen. Dofir géif ech d'Mme Familljeminister bidden, eng Informatiounscampagne an de Schoulen iwwert dës wichtigen Thema ze lancéieren.

Här President, Dir Dammen an Dir Hären, ech géif lech bidden, am Numm vu menger Fraktioun, dës Gesetzesprojet ze stëmmen. Et ass e Schrëtt an d'Zukunft.

Merci!

M. le Président.- Als nächst Diskussiounsriednerin ass d'Mme Lydie Err agedroen. D'Wuert huet d'Mme Err.

7. Dépôt d'une proposition de loi

Mme Lydie Err (LSAP).- Här President, Dir Dammen an Dir Hären, ech wëllt lech fir d'éischt eng Proposition de loi déposéieren iwwert d'Introduktioun vun der Médiatioun am Kader vum Code de procédure civile:

- *Proposition de loi 4969 portant introduction de la médiation civile et commerciale dans le Nouveau Code de Procédure Civile.*

Merci!

8. Projet de loi 4137 portant institution d'un comité luxembourgeois des droits de l'enfant, appelé "Ombuds-Comité fir d'Rechter vum Kand" (ORK) (Suite)

Discussion générale (Suite)

Da wëll ech zu deemem Projet 4137 kommen, a just op engem Punkt eng Widerhuelung hei maachen, déi zrëckgeet op d'Kannerrechtskonventioun vum 20. No-

vember 1989, déi zu Lëtzebuerg bei eis an der Chamber 1993 gestëmmt ginn ass. Am Kader vun där Ofstëmmung ass op Initiativ vum Gilbert Pregno eng Motioun hei vu mir initiéiert ginn, an unanime gedroe ginn, déi d'Institutioun vun engem Ombudsmann, enger Ombudspersoun gefrot huet. Vis-à-vis vun dëser Motioun huet Regierung ee grouse Mérite an a mengen Aen e puer grouss Feeler.

De Mérite besteet doranner, dass iwwerhaapt emol eng Kéier eng Motioun, déi an der Chamber ofgestëmmt ginn ass, an zwar unanime, während néng Joer Objet vun Debatten innerhalb vun der Regierung a vu verschiddenen Instanze war, déi deen Text vun der Regierung oder déi Texter vun der Regierung aviséiert hunn. Dat u sech ass e Mérite, dee seele genuch ass, fir dass et der wäert ass, dat ze ënnersträichen.

Schlecht ass awer dat Resultat, wat erauskommt ass an haut virläit. Trotz deenen néngjährege Beméiungen an trotz 20 Documents parlementaires, wat awer trotz allem relativ exceptionnel ass. Et ass nämlech esou, dass den Titel vun deemem Projet de loi net dem Inhalt entsprécht. Ech wäert probéieren - an et deet mer Leed, dass ech e bëssen technesch muss ginn - dat ze beweisen. Den Intitulé vum Projet stëmmt net iwwerene mam Text selwer, deen am Projet steet, soudass ech leider fir mäin Deel an och meng Fraktioun zur Konklusioun kommen, dass, esou wéi deen Text hei intituléiert ass, et sech ëm Etiketteschwindel handelt. Well: Eng Ombudspersoun ass e Médiateur. Wa mer da kucken, wat d'Regierung de leschten Hierscht proposéiert huet am Kader vum Projet de loi iwwert d'Introduktioun vun engem Médiateur zu Lëtzebuerg, a wa mer kucken, wat haut an deem Text hei steet iwwert de Kannermediateur, dat heescht de Médiateur, dee sech ëm déi schwächste Glidder an der Gesellschaft këmmere soll, dee misst eigentlech besser ausstafféiert sinn um Niveau vu senger Indépendance, vu senger Kompetenzen an Attributiounen wéi déi generell Ombudspersoun fir d'Erwuessener. Mer mussen awer feststellen, dass dat leider net de Fall ass. Ech wäert probéieren, lech dat Punkt fir Punkt ze beweisen.

Et ass sécherlech dofir och keen Hasard, dass spontan Avisen an deemem Dossier foisonnéieren. Et ass rar, datt zum Beispill d'Asbl Protection des droits de l'enfant en Avis gemaach huet, dass e spontanen Avis gemaach ginn ass vun der Commission consultative des droits de l'homme, an dass néng Associatiounen deeselwechten Avis ënnerschriwwen hunn, dass de Statsrot en Avis gemaach huet, mat Désaccorden op verschiddenen, a mengen Ae wichtige Punkten, mat dem Projet, wéi en elo amendéiert ginn ass.

Et kann een also soen, dass hei contre vents et marées eppes duerchgequetscht soll ginn, wat vun der Essenz vum Ombudsmédiateur eigentlech nëmmen nach den Numm huet. Et dierf ee sech net ieren an et muss ee wëssen, dass eng Ombudspersoun e Médiateur ass, deen am öffentleche Beräich agéiert, an deen also deene generelle Kritäre vun engem Ombudsmann entspreche